



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**25. Kalenderwoche – ab 20. Juni 2010**

## Zeid is Geld

Nu brad mir eenor een Schdorsch! Das dud misch abor frein! De Reischn off dor ganzn Weld ham de Griese gud ieborschdandn! Hammse das ooch gelähsn? Nee, is das nisch scheen?!

De Milljonähre sinn noch e bißl reischor gewordn un e baar neie sin dazugekomm! Ooch was de Milljardähre bedreffn dud - alles in Buddor! Die wern nu jedzd doch nisch offs Arbeitsamd missn un sisch fiehr Harz-Viere bewärm. Goddseidank! Odor - Godd sei Bank!

Nee, irschendwie bin isch da doch sähr erleischdord. Am Anfang, wo de Griese so offgebrochn is, da hadde isch werglisch e bißl Angsd gehabbd um de reischn Leide in dor Weld. Isch hab gedachd, es kennde villeischd doch ma bassiern, dass die Vorlusde ham dun, die se ruiniern dun kenndn. So - vom Milljonähr zum Dellorwäschor!

Schdelln Sie sisch ma vor, wenn die dann alle ihre Lugsusjachdn vorglobbn missdn! Fiehr billisches Geld! Abor was will mor mid so eim Schiff anfang? Das dud doch nisch offn Schlossdeisch droffbassn odor in Griebshdeen... wenn dann bledzlish alle mid Lugsusjachdn rumschibborn dädn... - nee, das däde nisch gehn. Un off dor annorn Seide häddesde ja keene Zeid, andauornd im Baziehfig odor im Adlandigg rumzubaddln. Du mussd ja arbeidn odor eema im Monad disch offm Arbeidaamd meldn. Nee, was däde unsoreem so eene Lugsusjachd nidzn? Nischd! Mir dädn uns bloß ärschorn, wens die Dingor infolsche von Vorarmung dor Reischn billisch gähm däde, abor mir missdn aus Vornunfdgrinde vorzischdn! Nee, is schon gud, dass de Reischn nisch arm gewordn sin! Solln die sisch doch mid ihre Lugsusjachdn selbor rumärschorn!

Glahr, isch weeß von friehor ausm Bardeilährjahr... - ooch wenn isch meisdens nisch rischdisch offgebassd hab..., aber isch weeß eischendlich noch, dass fiehr de Reischn jede Griese wie eene Badeguhr is - se reinischd un dud neie Gräfde vorleihn! Wobei - e rischdischor Griesch is nadiehrlich fiehr de reischn Leide noch e bißl besser. Abor immorhin - de Griese had scheinbar erschedema widdor bißl Schwung neingebrachd, had de Agdsjen bißl offgemischd! Un es heeßd ja ooch, dass mor das Geld ab un zu ma wendn muss, damids keen Schimml ansedzn dud un sisch weidor emsisch vormähren kann.

Wobei - isch due ooch ab un zu ma mei Geld wendn - abor finf Euros bleim bei mir - ooch wenn isch se dreima hin un härgewended hab! - bloß finf Euros. Wie die reischn Leide das hingrischn, dass dähn ihr Schrod sisch vormährn dud... - nee, Fiagra dud da beschdimmd nischd nidzn!

Isch gloobe, da brauchdsde was, was mir kleen Hansln eenfach nisch ham - Zeid! Ja, du mussd genieschend Zeid ham zum Rumfaulenzn. Zeid is Geld, heeßd es ja ooch.

So e Börsnfuggs aus Ameriga had ma gesachd: An dor Börse is zwee blus zwee nisch viere, sondorn finf minus eens! Du mussd ehm bloß abwardn kenn, bis das Minus vorbei is un viere achde gewordn is. Un die Zeid ham mir eenfach nisch!

**Eduard Sachsenmeyer**